

1995

Fimmtudaginn 11. nóvember 1993.

Nr. 469/1991. **Jóhanna Tryggvadóttir persónulega og
f.h. einkafirma síns, Evrópuferða**

(sjálf)

gegn

Þorkatli Skúlasyni

f.h. einkafirma hans,

Endurskoðunarskrifstofu

Þorkels Skúlasonar

(Stefán Pálsson hrl.),

og gagnsök.

Verklaun. Áskorunarmál.

Dómur Hæstaréttar.

Mál þetta dæma hæstaréttardómararnir Haraldur Henrysson, Garðar Gíslason og Gunnar M. Guðmundsson.

Aðaláfrýjandi, sem skaut máli þessu til Hæstaréttar með stefnu 25. nóvember 1991 að fengnu áfrýjunarleyfi 14. sama mánaðar, krefst sýknu af öllum kröfum gagnáfrýjanda og kostnaðar af rekstri málsins í héraði og fyrir Hæstarétti.

Gagnáfrýjandi skaut málinu til Hæstaréttar með stefnu 19. desember 1991 og krefst staðfestingar hins áfrýjaða dóms og málskostnaðar fyrir Hæstarétti.

Í hinum áfrýjaða dómi er lýst samskiptum aðila og störfum gagnáfrýjanda í þágu aðaláfrýjanda. Þau voru þess eðlis, að nauðsyn var samráðs og samvinnu málsaðila. Ljóst er, að verulega hefur á skort í því efni. Verður ekki nú séð, við hvorn aðila er fremur um það að sakast. Af málatilbúnaði gagnáfrýjanda í héraði má sjá merki þessa, þar sem krafa hans var þar engan veginn nægilega skýr og grundvallarupplýsingar vantaði, svo að erfitt var að átta sig á þeirri reikningsgerð, sem krafa hans byggðist á. Telja verður þó, að lögmenn aðila í héraði hafi bætt úr þessu, svo að viðunandi teljist.

Fyrir Hæstarétti ber aðaláfrýjandi fram sömu málsástæður og í héraði. Eigi hefur verið sýnt fram á, að veikindi gagnáfrýjanda haustið 1989 hafi komið niður á störfum hans í þágu aðaláfrýjanda. Sýnt er, að gagnáfrýjanda hefur hvorki verið falið að annast bókhald

fyrir árið 1989 né gerð ársreiknings fyrir það ár. Fallast ber á með héraðsdómara, að aðaláfrýjandi hafi ekki sýnt fram á, að störf gagnáfrýjanda og starfsmanna hans hafi verið illa unnin og að kröfur hans séu af þeim sökum of háar eða illa grundaðar. Verður því ekki talið, að aðaláfrýjandi hafi tekist að sýna fram á, að reikningar gagnáfrýjanda fyrir störf sín hafi verið óréttmætir. Ber því að staðfesta hinn áfrýjaða dóm um annað en málskostnað.

Gagnáfrýjandi höfðaði mál þetta í héraði sem áskorunarmál andstætt ákvæðum þágildandi 222. og 223. gr. laga nr. 85/1936 um meðferð einkamála í héraði, og reifun málsins í stefnu var ófullnægjandi. Setti þessi málatilbúnaður mark sitt á alla meðferð málsins, eins og fyrr er greint, og torveldaði skýrleik í kröfugerð beggja aðila. Þykir með hliðsjón af þessu rétt, að málskostnaður í héraði falli niður.

Aðaláfrýjandi greiði gagnáfrýjanda 40.000 krónur í málskostnað fyrir Hæstarétti. Hefur þá ekki verið tekið tillit til virðisaukaskatts.

D ó m s o r ð:

Hinn áfrýjaði dómur á að vera óraskaður um annað en málskostnað. Málskostnaður í héraði fellur niður.

Aðaláfrýjandi, Jóhanna Tryggvadóttir persónulega og f. h. Evrópuferða, greiði gagnáfrýjanda, Þorkatli Skúlasyni f. h. einkafirma hans, Endurskoðunarskrifstofu Þorkels Skúlasonar, 40.000 krónur í málskostnað fyrir Hæstarétti.

Dómur bæjarþings Kópavogs 15. mars 1991.

Mál þetta var dómtekið að loknum endurflutningi fyrr í dag. Það var höfðað með stefnu, birtri 26. febrúar 1990. Stefnandi er Endurskoðunarskrifstofa Þorkels Skúlasonar, kt. 200625-2859, Hamraborg 5, Kópavogi, en stefndu Jóhanna Tryggvadóttir, kt. 290125-4059, Kirkjuvegi 4, Hafnarfirði, og Evrópuferðir, kt. 470984-1049, Klapparstíg 25, Reykjavík.

Stefnandi krefst þess, að stefndu verði dæmdar til að greiða in solidum 246.041 kr. með [nánar tilgreindum dráttarvöxtum og málskostnaði].

Stefndu hafa krafist sýknu af öllum kröfum stefnanda og málskostnaðar úr hendi hans, er beri dráttarvexti skv. III. kafla vaxtalaga frá 15. degi eftir dómsuppsögu til greiðsludags.

Stefnandi kveðst hafa tekið að sér bókhaldsvinnu fyrir stefndu, Jóhönnu

og einkafirma hennar, Evrópuferðir. Sé skuld sú, sem kafið er um í máli þessu, skv. fimm reikningum, samtals að fjárhæð 391.281 kr., en greiddar hafi verið samtals 145.240 kr. Munurinn sé stefnufjárhæð málsins. Þá hefur stefnandi lagt fram yfirlit um þá vinnu, sem hann krefur um greiðslu fyrir, en hún var öll unnin af honum sjálfum eða starfsmönnum hans.

Stefnda Jóhanna hefur haldið því fram, að stefnandi hafi með öllu verið óvinnufær þann tíma, sem hann krefur um verklaun fyrir. Segir hún, að bókhald fyrir árið 1989 sé með öllu ófært. Hafi stefnandi skilað bókhaldsgögnum þess árs í árslok 1989, og hafi þau með öllu verið ófærð og ófrágengin. Þá hefur stefnda lagt fram kvittun frá stefnanda fyrir greiðslu á 50.000 kr., og er sú kvittun dagsett á öðrum degi en stefnandi kveðst hafa tekið við greiðslu frá stefndu. Kvittun þessi var eigi lögð fram, fyrr en munnlegur málflutningur var hafinn. Þykir því að öllu athuguðu eigi unnt að taka tillit til kvittunar þessarar, en stefnandi hafði eðlilega eigi ráðrúm til að fara yfir málsatvik að þessu leyti.

Stefnandi hefur í máli þessu gert fullnægjandi grein fyrir kröfu sinni. Kemur fram, hvenær unnið hefur verið og hver hefur unnið. Þá hefur hann lagt fram þá ársreikninga, er unnir voru á stofu hans. Verður eigi annað séð en stefnandi hafi unnið þau verk, sem hann krefur um greiðslu fyrir. Sú málsástæða stefndu, að stefnandi hafi verið með öllu óvinnufær, þykir engu skipta um niðurstöðu máls þessa. Er þá þess að gæta, að stefnandi hefur sýnt fram á, að verk hafi verið unnin, og því hefur eigi verið haldið fram, að þau séu svo illa unnin, að eigi verði krafist greiðslu fyrir. Þá hefur stefnandi aldrei haldið því fram, að hann hafi unnið ársreikning 1989. Er þá ekki annað fyrir en taka til greina kröfu stefnanda. Vaxtakröfu hans hefur eigi verið mótmælt sérstaklega. Verða stefndu dæmdar til að greiða stefnanda stefnufjárhæð máls þessa og málskostnað. Við ákvörðun málskostnaðar verður að líta til þess, að stefnandi krefur í þremur málum fyrir vinnu fyrir stefndu, Jóhönnu og einkafirma hennar, en eigi verður því haldið fram, að unnt hefði verið að stefna öllu í sama máli. Málskostnaður ákveðst 70.000 kr., og beri hann vexti, svo sem krafist er.

Með umboðsskrá dóms- og kirkjumálaráðuneytisins, dags. 15. febrúar sl., var Jóni Finnbjörnssyni, settum héraðsdómara á Keflavíkurflugvelli, falið að fara með mál þetta, og kveður hann upp dóm þennan.

D ó m s o r ð:

Stefndu, Jóhanna Tryggvadóttir og Evrópuferðir, greiði stefnanda, Endurskoðunarskrifstofu Þorkels Skúlasonar, 246.041 kr. með dráttarvöxtum skv. 10. gr. vaxtalaga af 53.641 kr. frá 1. október 1989 til 1. nóvember s. á., af 34.721 kr. frá þeim degi til 1. desember s. á., af 117.571 kr. frá þeim degi til 1. janúar 1990, af 243.771 kr. frá

1998

þeim degi til 1. febrúar s. á. og af 246.041 kr. frá þeim degi til greiðsludags. Dráttarvextir leggist við höfuðstól á tólf mánaða fresti, í fyrsta sinn 1. febrúar 1991.

Stefndu greiði stefnanda 70.000 kr. í málskostnað, er beri dráttarvexti skv. III. kafla vaxtalaga frá 15. degi eftir uppkvaðningu dóms þessa til greiðsludags.

Greiðslur ber að inna af hendi innan fimmtán daga frá birtingu dóms þessa að viðlagðri aðför að lögum.
